

Was merr su babbeld

Honnes, was hosden omm Somsdaach vor?
Isch? Isch habb nix vor. Awwer du, gelle?
Ja, mir misse enn Christboom kaafe.
Also enn Christboom willsde kaafe?
Was wollen merr ferr ooner, enn gruße Boom?
Naa, isch denk, eher enn kloone.
Su gons kloosd soller awwer aach nitt soi.
No ja, enn mittelgruße, enn Meter hoch.
Enn Meter? Su hoch wie de Kischedisch?
E bissi mieh.
Dess wär gut.
Was willsden fernn Boom?
Enn Christboom ewe.
Die duts nimmi gewwe.
Wie, nimmi gewwe?
Ess dut koo Christbeem mieh gewwe.
Jetz heer awwer uff, onn de Joseppskersch ...
... duts Weihnachtsbeem gewwe.
Also holle merr enn Weihnachtsboom.
Ja, weil die Christbeem abgeschafft worrn sinn.
Warum donn dess?
Weihnachte iss noch neutral, merr will joo vekaafe.
Was heeßden „noch“?
Noch heeßt, bis uff Weiteres.
Moonsde omm Christboom hädd sisch ooner gesteerd?
Ei ja. Unn bald steern se sich omm Weihnachtsboom.
Omm Weihnachtsboom steern? – dess glaab isch nitt.
Ess gibt joo aach koo Weihnachtsmärkt mieh.
Heer uff, iwverall gibt's Weihnachtsmärkt.
Awwer die haaße jetz onnersders.
Ah ja, Sternschnuppenmarkt.
Unn Schneeflockenmarkt odder Wintermarkt.
Moonsde, dass Weihnachte e Auslaufmodell iss?
Ja, dess moon isch.
Ei warum donn dess?
Weil dess Wort Weihnachte zu christlich iss.
Ach heer merr uff, su schlimm isses nitt.
Unn dessweesche werdd außem Weihnachtsboom ...
Was werdd aus dem?
... de Tanneboom.
Tanneboom? Moonsde werklisch?
Weilse bald koon Weihnachtsboom mieh vekaafe.
Aach onn de Joseppskersch?
Ja, aach dort.

Honnes, wo fiehrt denn dess hie?
Zu emm gons onnern Boom.
Unn zu was ferrn?
Zu emm Boom, der onn jeden vekaafd werrn kann.
Wie, onn jeden?
Aach onn die, die mett Weihnachte nix oofonge kenne.
Gibt's die?
Immer mieh.
Unn wie soll dess werrn?
Indem merr den Boom noch neutraler benenne dut.
Unn wie?
Doo brauch merr nor in die alt DDR ze gugge.
Was sieht merr doo?
In de DDR hotts koo Weihnachtsengel gewwe.
Koo Weihnachtsengel?
Naa, die hott merr dort Jahresendflügelfigur genennd.
Was hodden dess meddem Christboom ze due?
Weil außem Christboom iss schunn de Weihnachtsboom
worrn unn bald werdd draus de Tanneboom unn donn
werrds nimmi long dauern, donn werrderr Jahresend-
boom genennd, nor weiler donn vunn jedem in Deitsch-
lond gekaafd kann werrn, egal obber onns Christkind-
sche, onn Engel odder Weihnachte glaabd odder nitt.

Eiern Honnes